

Atvinnuvega- og nýsköpunarráðuneytið
Skúlagötu 1
101 Reykjavík

postur@anr.is

Reykjavík, 25. mars 2020

Efni: Umsögn um frumvarp til laga um opinberan stuðning til fjárfestinga í sprotu- og nýsköpunarfyrirtækjum

Vísað er til draga að frumvarpi til laga um opinberan stuðning til fjárfestinga í sprotu- og nýsköpunarfyrirtækjum sem birtist í samráðsgátt 19. mars sl.

Brunnur Ventures GP ehf. Frumtak Ventures GP ehf. gera eftirfarandi athugasemd við drögin að frumvarpinu:

1) Skilyrði fyrir því að Kría fjárfesti í vísisjóði er að a.m.k. einn erlendur aðili verði meðal hlutahafa í sjóðnum til að hún fjárfesti.

Þótt ekkert segi um það í frumvarpstextanum sjálfum kemur fram í athugasemdum við 3. gr. að gerð verði krafa um að „*hinir íslensku sjóðir hafi að minnsta kosti einn erlendan aðila meðal hlutahafa*“. Rökin sem eru gefin fyrir því eru mikilvægi „*þess að íslenskt umhverfi nýsköpunarfjárfestinga þroskist í samræmi við það sem tíðkast á alþjóðlegum mörkuðum, mikilvægi þekkingar og alþjóðlegs tengslanets*“. Auk þess kemur fram að þessari kröfu sé „*ætlað að tryggja að sjóðirnir þurfi að öðlast tiltrú á breiðari grundvelli en gagnvart hinu smáa og einsleita fjárfestingarumhverfi á Íslandi*“.

Í fyrsta lagi er þessi krafa í mótsögn við frumvarp til laga um rekstraraðila sérhæfðra sjóða, sem ætlað er að innleiða tilskipun ESB nr. 2011/61. Í því frumvarpi er ekki heimilt að markaðssetja fyrir erlendum fjárfestum Íslenska vísisjóði ef sjóðirnir eru einungis skráningarskyldir en hafa ekki starfsleyfi. Einungis sjóðir með starfsleyfi geta markaðssett sig erlendis gagnvart fjárfestum.

Í frumvarpinu er vísað til þess að íslensku sjóðirnir þurfi að öðlast tiltrú „á breiðari grundvelli“. Í þessu sambandi vilja umsagnaraðilar koma á framfæri að á Íslandi eru nú þegar mikil tengsl við erlenda fjárfesta í nýsköpun en íslenski markaðurinn hefur þroskast mikið á síðustu misserum hvað það varðar.

- i) Það eru tugir þekktra vísi- og tækni fjárfesta sem hafa fjárfest í íslenskum sprotum á síðasta áratug með íslenskum vísisjóðum, m.a. Novartis Venture Fund, Bay City Capital, Pivotal bioVenture, Tekla Capital Management, Nan Fung Life Sciences, Earlybird, Slack, Blueyard, Sequoia, Andreessen Horowitz, Tencent, Index Ventures, Atomico, Maki, BlueYard og Polaris.

- ii) Íslenskir vísifjárfestar í samvinnu við íslenska ráðgjafa í ráðgjafaráðum, stjórnnum og í samvinnu við íslenska athafnamenn erlendis, hafa verið farsælir í að koma á tengslum við erlenda vísifjárfesta þegar þörf krefur – og sýnir að það er ekki skortur á tengslaneti eða þekkingu við að laða að erlenda fjárfestingu vegna fjárfestingar í íslenskum sprotafyrirtækjum.

Vissulega væri jákvætt ef stór erlendur fjárfestir fjárfesti í íslenskum vísisjóð. Þó að slíkur fjárfestir komi inn í íslenskan vísisjóð væri samt alls óvíst að hann myndi beita sér fyrir að sjóðurinn eða umhverfið á Íslandi eða eins og segir í greinagerðinni „þroskist í samræmi við það sem tíðkast á alþjóðlegum mörkuðum“, eða innleiði þekkingu og komi með alþjóðlegt tengslanet fyrir sjóðinn. Það er miklu frekar að samstarf við erlendan vísisjóð sem fjárfestir í íslensku fyrirtæki sem íslenskur vísisjóð hefur fjárfest í, sem skapar slíka tiltrú. Það er vegna þess að hluthafi í vísisjóð hefur enga aðkomu að sjóðnum eða samtal sem hluthafi nema í gegnum hluthafaráð, sem hann jafnvel situr ekki í. Meðfjárfestir úr hópi erlendra vísisjóða hefur hins vegar mikið fram að færa þegar kemur að því að veita íslensku nýsköpunarfyrirtæki brautargengi á erlendri grund því auk fjármagns hefur hann yfirleitt mikla þekkingu og tengslanet á þeim markaði sem íslenska fyrirtækið ætlar að hasla sér völl á. Þess vegna er mun líklegra að slíkt samstarf skili sér í breiðari tiltrú á fjárfestingar í nýsköpunarfyrirtækjum hér á landi. Það leggja allir vísisjóðir hér á landi áherslu á að fá sérhæfða (sector specific) vísisjóði inn í þau félög sem fjárfest hefur verið í. Undirritaðir vísisjóðir eru til að mynda í samstarfi við fjölda sérhæfða erlendra vísisjóða í gegnum sínar fjárfestingar.

Um uppsetningu, skilmála og kjör íslenskra vísisjóða verður heldur ekki séð að erlendur aðili veiti þekkingu umfram það sem nú þegar tíðkast á meðal íslenskra vísisjóða. Það varð stór breyting á síðasta áratug þegar núverandi starfandi vísisjóðir og ábyrgðaraðilar þeirra og fjárfestar, innleiddu skilmála sem eru í takt við það sem tíðkast erlendis. Þessi þekking er nú þegar til staðar hér á landi.

Krafa um erlendan fjárfesti vegna fjárfestingar frá Kríu mun bæði bæði flækja fjármögnunarferlið og tefja tilurð nýrra vísisjóða, með mögulegum neikvæðum afleiðingum fyrir sprotaumhverfið og því leggja umsagnaraðilar til að henni verði sleppt.

Virðingarfyllt,
F.h. Brunns Ventures GP ehf.
Sigurður Arnljótsson

Virðingarfyllt,
F.h. Frumtaks Ventures GP ehf.
Svana Gunnarsdóttir